

elektronskom potpisu iz 2006. godine. Administrativni kapaciteti državnog Ministarstva transporta i komunikacija i dalje su nedovoljni.

U pogledu **audiovizuelne politike**, Vijeće ministara BiH je u martu 2013. godine usvojilo Odluku o utvrđivanju tijela nadležnog za saradnju sa nezavisnim regulatornim organima iz oblasti audiovizuelnih medijskih usluga i tijelu nadležnom za izradu liste važnih događaja za emitovanje u BiH. Usvajanjem ove odluke BiH je uskladila svoj pravni okvir sa Direktivom o o audiovizuelnim medijskim uslugama i potpisala Memorandum o saradnji sa Evropskom komisijom za učešće u programu Media 2007.

Vijeće RAK-a je usvojilo izmjene i dopune Kodeksa o komercijalnim komunikacijama u cilju regulisanja plasmana proizvoda u uslugama audio-vizuelnih medija. Također je izradilo smjernice za provođenje Kodeksa.

Vijeće ministara BiH još nije usvojilo ažurirani akcioni plan za digitalizaciju. Još nije donesena odluka o korištenju spektra oslobođenog prelaskom na digitalnu televiziju. Konkurs za nabavku digitalne opreme za tri javne radio-televizije je po drugi put oboren. Time je odgođen prelazak na digitalnu televiziju koji je početno planiran za kraj 2014. godine. Raspisan je novi konkurs za nabavku digitalne opreme. Radio-televizija Republike Srpske (RTRS) je pokušala emitovati program u DVB-T formatu u martu 2013. godine bez važeće licence RAK-a.

Statut javne radio-televizije Bosne i Hercegovine (BHRT) i dalje je nepromijenjen. Zakon o Radio-televiziji Federacije Bosne i Hercegovine i dalje je neusklađen sa zakonom na državnom nivou kojim se uređuje postupak za izbor članova Upravnog odbora javne televizije. Poduzeti su naponi da se finalizira reforma javnog sistema emitovanja Bosne i Hercegovine i uspostavi Korporacija. Reforma javnog RTV sektora dodatno je odgođena.

Imenovanja koja se ne zasnivaju na zaslugama i stalni izazovi u vezi sa nezavisnošću RAK-a i dalje izazivaju ozbiljnu zabrinutost (*vidjeti dio 2.2 - Ljudska prava i zaštita manjina*). Usklađivanje zakonodavstva u području elektronskih komunikacija i informacionog društva i medija tek treba izvršiti.

Sveukupno, pripreme su u ranoj fazi. Potrebno je uložiti znatne napore za razvoj elektronskih komunikacija i informacionog društva.

4.2.7. Finansijska kontrola

U pogledu **unutrašnje finansijske kontrole u javnom sektoru** (PIFC), na državnom nivou su u Zakon o finansiranju institucija Bosne i Hercegovine unesene izmjene i dopune koje predviđaju odredbe u skladu s kojima svaki budžetski korisnik mora potpisati godišnju izjavu o odgovornosti. U državi i entitetima se primjenjuju novi informacioni sistemi za upravljanje budžetom. Centralna harmonizacijska jedinica u Ministarstvu finansija BiH i centralne harmonizacijske jedinice u entitetskim ministarstvima finansija su pripremile podzakonske akte, kao što su priručnici, smjernice i povelje za unutrašnje revizore. Koordinacioni odbor centralnih harmonizacijskih jedinica se još nije sastao po pitanju svoje uloge u obavljanju jedinstvene platforme za koordinaciju pravnih propisa i metodologije. Aktivna uloga Koordinacionog odbora bi u značajnoj mjeri doprinijela napretku u provedbi unutrašnje finansijske kontrole u javnom sektoru. Kadrovske popunjavanje Centralne harmonizacijske jedinice FBiH i dalje predstavlja razlog za zabrinutost. Došlo je do neznatnog povećanja broja unutrašnjih revizora na nivou države i Republike Srpske, ali su nivoi kadrovske popunjenosti uglavnom ispod optimalnog nivoa.

Po pitanju **vanjske revizije**, ojačana je nezavisnost Ureda za reviziju institucija BiH od izvršne vlasti nakon što je Parlamentarna skupština BiH usvojila izmjene i dopune Zakona o ministarstvima i drugim tijelima uprave u Bosni i Hercegovini. Nisu preduzete dodatne mjere kako bi se osigurala finansijska nezavisnost ureda za reviziju institucija od vlada, ili pronašla ustavna rješenja.

U cjelini gledano, postignut je mali napredak u oblasti finansijske kontrole. Potrebno je uložiti značajne napore da se kompletira pravni okvir, ponovo uspostavi koordinacija između centralnih harmonizacijskih jedinica kroz Koordinacioni odbor, te ojačaju kapaciteti za provedbu unutrašnje finansijske kontrole u javnom sektoru. Tek je potrebno riješiti pitanje nezavisnosti ureda za reviziju institucija. Pripreme su u početnoj fazi.

4.2.8. Statistika

U pogledu **statističke infrastrukture**, saradnja između Agencije za statistiku Bosne i Hercegovine (BHAS) i entitetskih zavoda za statistiku je poboljšana, naročito u vezi sa pripremama za popis stanovništva i domaćinstava. Uprava za indirektno oporezivanje ne pruža dovoljno podataka Agenciji za statistiku BiH. Predložene izmjene i dopune zakona koje će omogućiti dijeljenje podataka su u parlamentarnoj proceduri.

Zavodi za statistiku su postigli dogovor o Strategiji za razvoj statistike u Bosni i Hercegovini do 2020., ali ona još nije formalno usvojena. Usvojen je dokument kojim se regulira provedba Kodeksa statističke prakse EU u Bosni i Hercegovini.

Što se tiče **klasifikacija i registara**, Statistički poslovni registar (SPR) je i dalje nepotpun zbog toga što nedostaju podaci iz nadležnih upravnih izvora. Dogovoren je petogodišnji plan razvoja SPR-a. Bosna i Hercegovina nije dostavila Evropskoj uniji podatke o BDP po glavi stanovnika koji su usklađeni sa NUTS 2 do 1. jula 2013, što je obaveza iz Privremenog sporazuma. Radna grupa za izradu klasifikacije teritorijalnih jedinica za statistiku u zemlji postigla je dogovor o prijedlozima NUTS 1 i NUTS 2. Rad na nivou 3 će se nastaviti nakon popisa stanovništva i domaćinstava.

Što se tiče **sektorskih statistika**, tri statističke institucije su nastavile pripreme za popis stanovništva i domaćinstava koji će se održati od 1. do 15. oktobra 2013. godine. Što se tiče makroekonomskih statistika, potrebno je dodatno raditi na razvoju nacionalnih računa. Bosna i Hercegovina se uključila u Opći sistem statističkog izvještavanja MMF-a (GDDS). Konačni rezultati Ankete o potrošnji kućanstava za 2011. objavljeni su u februaru 2013. Ostvaren je određen napredak u oblasti statistike poslovnog sektora, posebice u građevinarstvu, maloprodaji i turizmu.

U cjelini gledano, određeni napredak postignut je u oblasti statistike, posebice kada su u pitanju pripreme za popis stanovništva i domaćinstava, kao i statistici poslovnog sektora. I dalje je potrebno unaprijediti sektorske statistike, poput statistike nacionalnih računa, poslovne i poljoprivredne statistike. Potrebno je dodatno unaprijediti saradnju, koordinaciju i procese donošenja odluka u statističkom sistemu u državi.

4.3. Pravda, sloboda i sigurnost

4.3.1. Vize, upravljanje granicama, azil i migracije

Što se tiče **vizne politike**, na granici je izdato 150 viza 2012. godine, što predstavlja pad od skoro 40% (248 izdato je 2011.). U prvoj polovini 2013. na granici je izdato 49 viza, što je pad od 38,88% u odnosu na isti period 2012.